

影宋本太平寰宇記補闕

古逸叢書
之二十六

氏校刊
遵義黎

太平寰宇記序

朝奉郎太常博士直史館賜緋魚袋臣樂史

臣聞四海同風九州共貫若非聖人握機蹈杼織成天下何以逮此自唐之季率土縈兵裂水界山窺王盜帝至于五代環五十年雖奄有中原而未家六合不有所廢其何以興祖龍爲炎漢之梯獨夫啓成周之路皇天駿命開我

宋朝太祖以握斗步天掃荆蠻而幹吳蜀陛下以呵雷叱電蕩閩越而縛并汾自是五帝之封區三皇之文軌重歸正朔不亦盛乎有以見皇王之道全開闢之功大其如圖籍之府未修郡縣之書何以頌

萬國之一君表千年之一聖眷言關興過在史官雖則賈耽有十道述元和有郡國志不獨編修太簡抑且朝代不同加以從梁至周郡邑割據更名易地暮四朝三臣今泐波討源窮本知末不量淺學撰成太平寰宇記二百卷并目錄二卷起自河南周于海外至若賈耽之漏落吉甫之闕遺此盡收焉萬里山河四方險阻攻守利害泐襲根源伸紙未窮森然在目不下堂而知五土不出戶而觀萬邦圖籍機權莫先於此臣職居館殿志在坤輿輒撰此書冀聞天聽誠慙淺略仰冒宸嚴謹上

太平寰宇記卷第一百一十三

江南西道十

岳州

興國軍

岳州

岳州

巴陵郡今理巴陵縣

南隣蒼梧之野古三苗國地又爲麋

子國春秋文公十一年楚子伐麋即此有青草洞庭
巴丘三湖在焉戰國末猶屬楚亦爲楚羅國之地故
楚辭言汨羅是也羅縣北有汨水即屈原所溺處秦
并天下爲長沙郡地按楚地記云巴陵即瀟湘之淵
在九江之間二漢因之吳以爲要扼之地置戍兵以

鎮之建安中孫權使魯肅孫皓時萬彊皆屯於此又
吳錄云晉分長沙之巴陵等六縣置建昌郡在巴陵
按今州即晉建昌郡也以陶侃鎮之後省入長沙至
宋文帝又分其地置巴陵郡按齊永明二年封子倫
爲巴陵王後爲廢帝所害梁武帝又封齊明帝子寶
義爲巴陵郡王奉齊後以繼三恪至武帝末湘東王
遣陸法和等據赤亭擒侯景將任約於此今郡西華
容界有赤亭故城是也城近赤亭湖因以名之尋至
元帝都荆別立巴州領巴陵郡至隋平陳廢郡改巴
州爲岳州煬帝元年改爲羅州三年又改爲巴陵郡
至十三年郡人董景珍等以羅縣令蕭銑爲主起兵

於此唐武德四年平蕭銑置巴州領巴陵華容沅江
羅湘陰五縣六年改爲岳州省羅縣天寶元年改爲
巴陵郡乾元元年復爲岳州

元領場縣六

今縣四場一

巴陵

華容

平江

橋江

舊名沅江

王朝場

一縣割出

湘陰

入潭州

州境

東西三百四十七里

南北一百二十里

四至八到

東北至東京陸路一千八百一十六里水路四千三百四十四里

西北至西京一千八百六十五里

西北至長安二千一百二十五里

東至鄂州七百里

南至潭州二百八十里

西至澧州三百二十里

北至復州沔陽縣五百五十里

東南至洪州一千八百五十六里

西南至卽州六百里

西北至江陵府五百七十五里

東北至鄂州五百七十五里

戶

唐開元戶一萬七千一百

皇朝戶主六千二百九十八客八千二百九十七

風俗

同湘州

人物無

土產

白紵布

魚

稻

鱉甲

貢

鮑魚

龜甲

鱣魚

巴陵縣

舊五鄉
今一鄉

本漢下雋縣之巴丘地漢書地理志

下雋縣屬長沙國按漢下雋縣在今鄂州蒲圻縣界此即其地又按輿地志云巴上有大屯成魯肅守之按郡城即肅所築也蜀志曰西增白帝之兵北增巴上之戍皆此地吳爲巴陵縣吳錄地理志云巴上縣屬長沙郡江源記云昔羿屠巴蛇於洞庭其骨若陵故曰巴陵淮南子曰斬脩蛇於洞庭是此地也自吳至唐州皆理於此縣界有古巴上。岳陽樓唐開元四年張說自中書令爲岳州刺史常與才士登此樓有詩百餘篇列於樓壁。大江在縣北五里東流入洞庭。湖水在縣西南一里五步會洞庭。雲夢澤半在江南半在江北其

水中平土上半出有篠幹森松之翠。五渚戰國時秦破荆襲郢取洞庭五渚是也。望夫山郡國志云巴陵望夫山昔婦人望夫因化爲石。君山博物志云君山洞庭之山是也。帝之二女居之曰湘夫人。帝女遣精衛至王母取西山之玉印。東海北山庾穆之湘州記云昔秦皇欲入湘觀衡山而遇風浪溺敗至此山而免。因號爲君山。又荊州圖經云湘君所遊。故曰君山有神。祈之則利。涉山下有道。與吳包山潜通。上有美酒數斗。得飲者不死。漢武帝故事云帝齋七日遣藥賓將男女數十人至君山得酒欲飲之。東方朔曰臣識此酒請視

之因即使飲帝欲殺之朝曰臣若死此酒不驗如其有驗殺亦不死帝赦之。洞庭湖山海經云洞庭之山帝二女居之是遊於江淵澧沅之風交瀟湘之淵是在九江之間唐孟浩然詩云氣蒸雲夢澤波撼岳陽城許渾詩云四顧疑無地中流忽有山。巴上湖湖中有曹由洲即曹公爲孫權所敗處。夏口浦郡國志云夏口浦有龍魚昔禹南濟黃龍夾舟之所。曹由洲按通典括地志云巴湖中有曹由洲即曹公爲吳所敗燒舡處在今縣南四十里又云今鄂州蒲圻縣有赤壁山即曹公敗處按三國志云劉表卒其子琮代屯襄陽劉備屯樊琮降曹

公備遂南走曹公恐備先據江陵將精騎急追及於當陽之長坂備與數十騎走斜趣漢津濟沔到夏口曹公進軍江陵得劉琮水軍舡步數十萬自江陵征備至巴上遂至赤壁孫權遣周瑜水軍數萬與備併力逆之曹公泊江北岸瑜部將黃蓋詐降戰艦數十艘因風放火曹公大敗從華容道步歸退保南郡備瑜等復追之曹公留曹仁守江陵城自徑北歸而漢陽郡圖經云赤壁城一名烏林在郡西北二百二十里在沔川縣西八十里跨沔南北此大誤也曹公既從江陵水軍沿流已至巴上則今巴陵郡赤壁只在巴上郡之下軍敗引還

南郡劉備周瑜水軍追躡並是大江之中與汭川
西殊爲乖角今據括地志爲是當在巴陵江夏二
郡界其漢陽郡圖經及俗說悉皆訛繆所以備錄
國志以爲證據爾。生江湖與青草湖相連大小
與太湖相似。青草湖側有青草因以爲名在縣
西南七十九里有青草神廟沅水亦經此城下故
水經云注洞庭方入大江是也。象湖巴蛇吞象
曝骨於此因以名湖。鴨欄磯郡國志云巴陵之
地有鴨欄磯即建昌侯孫慮作闢鴨欄於此陸遜
諫止之所因得名

華容縣

西一百六十六里蒲洞庭赤陂二湖
水路二百三十五里舊五鄉今四鄉

漢孱陵

縣城吳大帝分孱陵縣地於今縣東北二里置安
南縣至隋平陳改安南爲華容縣屬羅州取古華
容城以名之按古華容在竟陵郡界與今邑相近
爾大業三年以羅州爲巴陵郡十年以縣移於今
理垂拱二年犯武氏諱改爲容城縣神龍元年又
改爲華容縣。方臺山在縣南二十里蕭誠荆
南志云山出雲母土人採之先候雲所出之處於
下掘取無不獲往往長五尺者可以爲屏風當掘
之時忌有聲響則所得麋惡。神護山在縣西南
三十五里。立石山楚詞云馳余車於立石又云
步余馬於洞庭是也。雲母泉李華雲母泉詩序

云洞庭戶西玄石山俗謂之墨山山南有佛寺倚松嶺嶺下有雲母泉泉出石引流分渠周遍庭宇發源如乳湏末派如淳漿烹茶灌園漱濯皆用之大浸不盈大旱不耗自墨山西北至石門東南至東陵廣輪二十里盡生雲母墻堦道路烱如列星井泉溪澗色皆純白鄉人多壽考無癘痼疥搔之疾華深樂之是也。青草湖中有大江在縣東一百里屈而南與沅湘二水合湘水春夏漲冬入零陵則大江見。赤沙湖在縣南六十里。楊子洲洞庭記云此洲之間嘗苦蛟患昔荆有攸飛者將太阿渡江江神奪之兩蛟夾船攸飛入水斬蛟而